

տաքթրուքեամբ նայում էին: Մենք, երկրի սովորութեան համեմատ, «բարի աջողումնէ ասելով անցանք: Տեսնելով, որ մենք դէպի վանքն ենք գնում, նրանցից մէկը խումբից բաժանոնեցաւ, եկաւ մեզ հետ: Դա մի երիտասարդ արեղայ էր, որ առաջարկեց առաջնորդել մեզ մինչեւ վանքը: Երբ բաւական մօտեցանք վանքին, Ասլանը հարցրեց նրանից.

– Մենք կարո՞ղ ենք գտնել Չայրիկին վանքումը:

Այդ անունով կոչում էին վանահօրը:

– Դուք չճանաչեցի՞ք նրան, – զարմանալով հարցրեց արեղան, – Չայրիկը հէնց նա էր, որ վարում էր գութանը:

– Այդ ի՞նչ գութան էր:

– Չայրիկը նոր բերել տոնց Եւրոպայից. այսօր առաջին փորձն էին անում: Սպասում ենք ուրիշ երկրագործական անօթներ եւս շուտով ստանալ:

– Վանքը երկրագործութեամբ է պարապում:

– Այո, իր կալածները ինքն է մշակում: Բայց մենք ունենք վանքում եւ երկրագործական դպրոց:

– Երկա՞ր կը մնայ Չայրիկը այնտեղ:

– Երկար չի մնայ: Նա տեսաւ, որ դուք վանքն էք գնում, ինձ պատուիրեց, որ ձեզ տանեմ, այնտեղ հանգստացնեմ, մինչեւ իր վերադարձը:

Երբ հասանք վանքը, երբ շրջապատի գլխաւոր դռնից ներս մտանք, երբ հետզհետէ երեւան եղան այդ հինաւուրց սրբավայրի պատկառելի շինածքները, նրանց արտաքին տեսքը միայն իմ վրայ այն տպաւորութիւնը գործեց, որ ես հակամայից սկսեցի մտածել, թէ այստեղ անպատճառ տեսնելու եմ Կտուց անապատի հակապատկերը: Եւ իրաւ, այստեղ շնչում էր մի այլ կեանք, երեւում էր մի այլ աշխարհ, այստեղի մթնոլորտը ներշնչած չէր անապատական մշտավառ խունկի թուլացնող եւ վիատեցնող ծխով, այստեղ միացրել էին հոգեւորը եւ երկրայինը աշխարհայինի հետ:

Վանքը թէ՛ արտաքուստ եւ թէ՛ ներքուստ հովանաւորած էր ծառերով ու պարտէզներով. վագում էին սառն, յստակ աղբիւրներ, եւ ջրերի վտակները հաւաքելով, մեծ աղմուկով դարձնում էին վանական ջրաղացի ծանր աղորիքը:

– Այդ ծառերը Չայրիկի տնկածն է, – ասաց մեր առաջնորդը, – այն ջրաղացը երկար ժամանակ խանգարած էր, չէր բանում, Չայրիկը նորոգեց: